



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долшом оголошеню значна знижка.

Конто чекове Нр. 404.155.

Опасность войны на Дальнем Востоке.

Положене на Дальнем Востоке заостряет ся с каждым днем. Вправді Япония хотіла бы за всяку ціну зликвидовати конфликт, але Совіты, видячи того, стають ся чим раз больше агрессивны.

Японский амбасадор робил знова пробу мирового полагодження справы и в той цілі перевел 3-годинну конференцию с Литвиновым. Конференция не дала однак пожаданных результатов, бо жадания Японии и России сут цілковито рижны и трудно буде их узгоднити.

Праві одночасно с японо-советском конференциом маршал Блюхер приїхал лично на фронт и обнял начальство армии. Факт тот ест уважаний за сильне заострене положеня. Появлене ся марш. Блюхера на фронті манджурском пояснюють собі политичны круги так, же Совіты не думают уступати от своих жадань, поставленных Японии, а также тым, же марш. Блюхер достал свободу дійствия на Дальнем Востоке.

До Ново-Киевска, місточка, положеного

недалеко границы манджурской, памятного с войны японской в р. 1905. тым, же там стоял через якийси час штаб генерала Куропаткина, приїхал также заступник комисара справ внутренних Мехлис, котрый переводит „чистку“ серед червонной армии.

На заострене положеня вказуе также факт, же во всіх советских газетах появил ся перший официальный комунікат военный, поданный через штаб I. армии Приморского Краю о положеню на фронті. Комунікат тот звучит: „Япония распочала военны дійствия с Совітами. Советскы войска, поддержаны отрядами артиллерии, приступили до акции, маючой на цілі усунути японскы войска с советской терытории. Авиация советска приняла активну участь в очищеню теренов с отрядов японских войск. Советскы войска заняли всі потребны стратегичны позиции“.

Комунікат тот был поданный через всі газеты и оголошенный через радио.

Война ест неизбежна,

заявил ген. Араки.

До конца серпня, або в початках вересня положене на Дальнем Востоке выяснит ся и або приїде до войны меже Японией и Совітами, або буде згода. Так сказал ген. Араки, б. министр войны, а теперешный министр просвіты корреспондентови газеты „Берлинер Тагеблятт“.

Ген. Араки заявил, же японске правительство рішительно стремится до удержания мира, а доказом того ест проба мирных пере-

говоров. Если однак помимо того Совіты будут дальше провоковати Японию, то Япония приїме войну и она не боит ся воювати на двух фронтах.

Зрештом велика рижница поглядов и безпрерывна помоч, яку Совіты дают кытайцам и так станут ся перше, чи позднійше, причином войны меже Японией и Совітами. Война ест отже неизбежна — закончил свое заявлене генерал Араки.

В Палестине дальше беспорядки.

Борба меже арабами и жидами в Палестине не лем не уступае, але наоборот, она приберат на силі. Жиды расписали своего рода мобилизацию и вербуют молодых людей для обороны жидовских колоний перед арабскими нападениями. До того часу звербовало ся понад 1000 молодых жидов в самом Ерусалимі, для обороны колоний. Одночасно

в 26 маленьких и отдільно стоячих жидовских колониях Палестины распочато фортификацийны работы, чтобы обезпечити их ліпше перед нападениями со стороны арабских террористов. В tych колониях будуют каменны стіны, плоты с кольчастого дрота и прожекторы.

В звязи с беспорядками в Палестине Ан-

глия выслала министра колоний, Малькольма Макдональда до Палестины, чтобы он на місци розслідил, які міры належит принять для успокоения краю. В Лондоні думают, же найскорше допроводит до згоды поділ Палестины на кантоны (малы провинции). Проект дотеперешного поділу на часть жидовску и арабску не подобат ся ани жидам, ани арабам, а такой поділ на кантоны, в котрых могли бы жити и одны и другы, скорше успокоил бы умы и допроводил до порядку.

Макдональд забавил в Палестині і пару дней, облетіл на самолете всі ей границы и отлетіл назад до Лондону, где мае приготовити плян успокоения Палестины, котрый мае быти оголошенный с концом того місяца.

Полне ровнотуправненє меншинств в Румунии.

В Румунии оголошено новый декрет о меньшинствах, котрый признае всім меньшинствам полны права языковы и религиозны.

Меньшинства могут уживати своего языка в газетах, в справах приватных и торговых, на собраниях и нарадах, а в гдеяких частях краю также и в суді. Меньшинствам признае декрет право закладания школ, святынь и добротинных организаций, котры мають користати с публичной помочи.

В звязи с тым заименовано генерального комисара для справ меньшинств и опубликовано регулямин того комисариату.

Регулямин предвиджат, же согласно с конституциом всі румунскы граждане, без взгляда на религию и национальность сут ровны в виду права и повинни уважати отчину за найвысшу цілі своего жита.

Румунске правительство буде робити всякы улегченя национальным меньшинствам там, где выкажут они большу численность.

Закрито діяльність українских организаций. Администратийны власти закрыли на неограниченный час діяльність украинских организаций: „Сільский Господар“, „Рідна Школа“ и „Садочок Рідної Школи“ в Пондячі в пов. перемыском. Причином за- закрыта были статуты перекроченя.

Заболіла их правда.

В нашой газеті с 16. червня т. р. помістили мы допись: „Чом их ніт”, в котрой подали мы назвиска тых наших крайнов, жиющих в Амерыці, яки не забыли своей родины и зложили жертвы на Руску Бурсу в Горлицах, а також выказали счудоване, што меже жертводателями не было назвиск тых, котры жили в бурсі, яко ей воспытанники и котры той бурсі завдячуют свою науку и свое теперешне положене.

Пишучи тоту допись, мы надіяли ся, што давны бурсаки, жиючи тепер в Амерыці, а передовсем Пыж и Дм. Вислоцкий, о котрых знаме, же поводит ся им добре, отозвут ся также и то в формі переслання своей жертвы на Руску Бурсу в Горлицах. Тымчасом они отозвали ся, але цілком инакше. Вмісто жертвы, они нашмарили ся и обметали болотом так г-на Стефана Шкимбу, котрый занял ся в Амерыці зберанем жертв и тоты жертвы привез с собою до краю, як и членов правления Лемко-Союза, называючи их зрадниками, полякоманами и т. д. Свои брехливы клеветы помістили они в американском Лемку и оперли их на том, што правлене Лемко-Союза на своем засіданю, отбытом в червні в Сяноці, заявило „свою полну и активну льяольность в виду польской державности.

Тото правда, — на собраню мужей довіря в Сяноці ухвалено одноголосно заявити полну и активну льяольность в виду польской державности и с тым ми ся не крыеме, ани ся того не встыдаме, бо уважаеме тото за цілком природне и за обовязок кожного порядочного гражданина даной державы. Ми тото не лем заявили на собраню в Сяноці, але мы напавду льяольны и прото тыж в нашом заявленю ніт фальшу. Яко льяольны граждане, выполняючи уцтиво наш долг в виду державы, маме мы полне основане домагати ся для нашого населеня всіх национальных и культурных прав и мы тото также при каждой случайности робиме. Гдеж в виду того ест то-то рабство, полякоманство, зрада и т. д., о котрых пише амер. Лемко. Чи ж бы редакторы того „Лемка” не розуміли слова „льяольность” и не отрижняли его от слова „рабство”? А може они судят ведля себе, бо коли

льяольность в виду власной державы ест явлением природным, то така любов для Сталина и Ежова, яка проявлят ся в амер. Лемку выдае ся цілком подозрительна и даст ся пояснити лем отношенем платного раба до своего пана.

Так, так панове пыжо-гунянки, лучше може было бы вглянути в мотивы своей діяльности, а не нападати на честных людей, котры народну роботу уважают за свой национальный долг, а не за жолоб наживы. — Нашмарянем ся на других, черненем их и клеветом вы себе не выбілите. На таком патриотизмі скоро всі ся познают и дадут вам ціну. Вмісто шмаряня клевет, лучше сягнути в добре напханы кышені и жертвовати от часу до часу свою лепту на народны ціли. Выхвала вас бурса, отдайте тото. Нехай каждый с вас даст хоц лем тилько, килько достал. Жил через 8 літ на бурсацком хлібі, най даст через 8 літ удержане другому, желаючому учить ся школярику. Найде ся напевно такой так в Лабовой, як и в Вапенном. Того вымагат от вас честь и патриотизм, котрым вы так часто любите хвалити ся. А от порожного молотя сытым никто не буде.

Зрештом не штука из за угла нападати на других, знаючи, же за тото не буде ся потягненым до ніякой отвѣтственности. В амер. газетах вы можете назвати нас злодіями, бандытами, ошустами и т. д., бо за тото нич ся вам не стане, а мы знаме не от тепер, же вы в таких случаях храбры. Уж в Талергоф оказали вы тоту храбрость, коли мучено наших хлопов за тото, же читали пожичены у вас рускы книжки, а вы выперли ся того, же взяли их от вас, хоц вам нич бы ся не стало, бо тоты книжки выдала вам цензура, выпускаючи вас с криминалу в Кракові.

Знаме и гунянчин демократизм, бо он проявил ся в криминалі во Відні по одержаню через Гунянку грошей от вспомогательного комитета. Перед тым вы упрекали тых, котры жили лучше от вас за власны гроши, же ся своим добром не ділят, але коли вы достали гроши от вспомогательного комитета, отже такы, на котры складала ся ціла общественность и то не для вас, а для всіх потребующих помочи, вы зробили ся першим элегантом и на Старицкого и Гадзюка кричали вы,

як економ на парбков, коли они зближали ся до вас. А преця тот Старицкий и Гадзюк мали таке саме право до тых грошей, што и вы, лем же они пришли под вашим адресом. Для вас тото было не важне, важный был лем факт, же вы при грошах, а у них их дальше не было. И так, покаль и вы их не мали, то вы разом с нима были демократом, а появили ся у вас гроши — без кыя не приступай.

Наконец, я зроблю вам одно предложене. Вы такой храбрый, такой „безкористный” патриот. Вы можете спасти народ, котрый мы по вашому мнію здраждаме и запродаеме. Прото тыж ест лем оден выход с положеня. **Приїзжайте ту и спасайте! Отпустите вам всі наши теперешны доходы и отдаме сейчас редакцию и цілу роботу, а сами здалека будеме приглядати ся вашим успіхам.**

По што тратити слова, мы присмотріме ся вашим ділам и напавду и щиро будеме радовати ся, если вы перепроводите тото ліпше от нас.

Крокодыль вырвал ся с клітки и втек до рікы. В Гданску мала місце цікава история. Со ставка, в котром містил ся крокодыль, потрафил он утечи и достал ся морского каналу Мотлавы, будячи переполох серед находячих ся на берегах людей.

Рано, коли работники наміряли промом переіхати канал, взріли его выгріваючого ся на піску. Крокодыль скочил до воды. Тымчасом на березі згромадила ся толпа людей, а также полиция, страж пожарна и страж портова.

Понеже крокодыль привык до людей, нич собі с них не робил и уживал спокойно купелі, показуючи ся лем рідко над водом.

В том часі появил ся властитель крокодыля, котрый выяснил, же крокодыль мае уж 300 літ и зове ся Оттокар. Просил при том, штобы крокодыля не стріляти. Потом всіл он до лодкы и поплынул за крокодылем, хватючи его за хвост. Крокодыль думал видно, же он робит шпасы, бо ся му все вымыкал. Така забава тревала пару годин, аж до часу, коли крокодыль зголодніл. Втотчас дал ся он приманити куском мяса. Коли крокодыль наближил ся до мяса, зашмарено ему шнуры на шию и кадолб и втягнуено до лодкы.

М. А. Т.

Вспомины с р. 1914.

(Продолжене).

В Мушині держали нас под ескортом пару годин. Была то одна мук. Што хвиля переходячи люде заглядали до комнаты, гре мы находили ся и позволяли собі рижны крыляты слова под нашим адресом. Аж около год. 4-ой по полудни надіхал поїзд с Крыницы, котрым перевезено нас до Нового Санча. Зсідаючи до поїзда, застали мы там д-ра Александра Циханского, лікара с Крыницы, котрого также арештовано и прилучено до нашего транспорта. Серед насмішок и допекающих до живого слов идучой с нами в позді толпы доіхали мы до Нового Санча, где перед стайным будынком собрала ся толпа людей, котра встрітила нас битем и прозвищами. Пустили в ход слова, зрадники, шпёны, на гак с нима, повісити тоту банду, а также палкы и козярки. Ал. Милянича ударил знаный сандецкый міщанин так сильно палком по голові, же через капелюх перетял ему скору.

Толпа почала так сильно наперати, же конвоюющий нас офицер боял ся, же она перерве ланцух хоронячой нас ескорты и приказал допровадити нас до касарні, находячой ся близко стайного будынку. Там познакомили мы ся ближе. с „культуром” давных австрийских офицеров. Уже коло стайного будынку рушил за нами добровольно якыйсь „лейтнант” с вытягненым в нашу сторону револьвером, выкрикуючи, што выстрілят нас всіх, як собак. В касарні тот самый „пан лейтнант” прискочил найперше до А. Милянича, вырвал ему с кышені ночну кошелю, котру вышмарил на пец и почал его бити за тото, же такой „зрадник” хоче собі в криминалі догаджати. Погодивше, также без причины, шмарил ся на Ивана Андрейка и почал его дусити. Достало ся и другим от патриотычного „лейтнанта”. Аж наконец запи-

ненный от злости, мечучи проклонами на ліво и на право приказал пан лейтнант розмістити нас по ейнцлях, правдоподобно для того, штобы мы не зговорили ся „высадити ище оден мост”, от так нпр. в Новом Санчі.

А толпа, котра задержала ся перед воротами, ведучима на двор касарні росла и увеличала ся. Росла в ей очах также и наша провинна. Оден сказал штонибудь, другой прикрасил, третий додал, инший доложил и так в очах толпы вырастали мы на Бог знае яких опасных преступников, мающих на своей совісти може половину австрийской армии. Не дивота, же постава толпы была для нас крайне враждебна и же бідным был бы каждый с нас, кто в том часі попал бы в руки той толпы.

По недолгом часі выпроваджено нас знова на двор (гоф), уставлено за тягаровым возом, запряженным в пару коней и окружено двойным рядом вояков, котры в формі подковы окружали нас с трох стран. Перед возом усувала ся толпа и таким способом могли мы посувати ся наперед. Але горе было каждому, кто высунул ся в одну, або в другую сторону так близко ку воякам, же через них могла его досягнути дачия палка. Тот чим скорше отскакивал до середины с гузом на голові. Наибольше били и шкалили якоси поляка с Концльовы коло Грибова, котрый мал брата „ксендзом” и от него доставал старшу одеж. Через тоту одеж толпа принимала его за русского священника. Достало ся ему — бідакови — достало. Не щадила ему толпа ани ударов, ани прозвищ, проклонов и щирых пожелань. А он, находячи ся меже нами — „голосныма зрадниками” — был безсильный. Правда, на нем тяжила векша провинна, як на нас, бо он не явил ся на час до мобилизации, а мы и такого преступления не мали на собі, але помимо того „слава” наша бла голоснійша и нас уважано за страшных преступников.

Як охоронити ся перед слинавком.

Слинавка, звана также пырщица ест хворотом пыска и ратиц. Ест она трудна до курации, бо до тепер наука не знае его заразка (бакцыля). Прото тыж завлечена, росширяется скоро и спричинят великы втраты. В том році слинавка обняла праві всі западно-европейскы краи и в послідных місяцах передостала ся до Польщи.

Каждый господар повинен старати ся не допустити тоту заразу до своей стайні, а если уж она появила ся, то стреміти, штобы хворота выгасла як найскорше. Як в инших, так и в том случаю легче ест устеречи ся перед хворотом, як ю со стайні выгнати, коли она уж там ся розгостила.

Штобы устеречи ся перед слинавком, треба што 8 до 10 дней высмаровати очищенным дегтем копыта и ратичны шпари аж до місца, в котром худобу путае всім коровам и свиням, а особенно тым, котры ходят по дворі и на пасовиско. Відома річ, же хворота появлять ся найперше в ратичных шпарах, прото тыж там треба смаровати найстараннійше.

Треба также дбати о того, штобы худоба стояла на сухом постелиню, а не на мокром гною. Добре ест давати под худобу навоз конский, котрый в літі легко ся розкладат, выділяючи амонякальны газы, котры убивают бактерии (заразкы) слинавкы.

Што пару дней треба пыск худобы переполокати водом с запареной попрыовой мяты, беручи 2 ложки мяты на 1 л. воды.

В часі пануючой хвороты не треба ани самому входить до чужих стаен, ани никого чужого впускати до своей стайні. Ходит ту особенно о гандлярей, котры, не могучи купити худобы на торгах, ходят часто по рижных стайнях и на боганчах переносят хвороту с одной стайні до другой.

Газеты доносят, же в Німеччині вынайде-но лік, котрый защеплений худобі, хоронит худобу на пару місяцов перед том хворотом. Роблены с тым ліком досвіды дают подобно добры результаты. Если бы так было, то борьба со слинавком буде легча и певніша.

На разі однак господар повинен всіма силами старати ся не допустити слинавкы до стайні, памятаючи, же хворы коровы мечут перед часом телята и тратят молоко. Втраты от того сут значно выши от выдатку на дегеть и мяту. Не треба забывати и о том, же часами перебіг слинавкы ест так тяжкый, же худоба падат. Втотчас втрата ест уж велика. Также бывають случаи, же слинавком заражають ся люде, при котрых хворота кончит ся смертю. Прото тыж каждый селянин повинен дбати, штобы охоронити свою худобу перед том заразом. В разі хвороты не повинно ся пити невареного молока ани істи масла от хворых на слинавку коров.

В Редакции „Лемка” в Крыниці можна достати ріжны книжочки религиозного содержания.

Зміна способу про- давання яйц.

С Польщи высылат ся каждого року яйца за границу и то за великы гроши. Але помимо того, же за границом сут яйца дороги, у нас их ціна ест низка. Зарабят на том цілом интересі лем посередник, котрый купуе яйца на штуку, платячи за них не того, што они вартають, а тилько, килько хоче.

Штобы зменьшати доходы посередников и тым самым поднести рыноку ціну яйц, Министерство Промыслу и Торговлі выготвило проект зарядження о торговлі яйцами, на основі котрого буде обовязовати примус продажи яйц на вагу. Яйце тяжше буде мати вышшу ціну, яйце меньше — низшу. Экспортовы фирмы будут мати право куповати яйца лем на згоры означеных частях краю, што даст возможность переводити в тых фирмах контролю. Контролі будут подпадати рыноку ціны так, што посередник не найде возможности використати селян.

Комунальна Каса Ощадности Повіта Краковского в Кракові

Рок основания 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л е н я : К Р Ы Н И Ц А, тел. 112.
В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.

Серед такого шпалеру, тягнучого ся вздолж цілою улицы Кунегунды, Ягайлонской и Шведской допrowаджено нас до арештов Окружного Суда в Новом Санчі. Там на сходах „пан лейтнант”, котрый и тым разом добровольно жертвовал свой труд для добра и славы Австрии, мал знова нагоду показати свой патриотизм исвою культуру. Идучий в переді его колега не позволял ити скоро, а он сам ишол созаду и кричачи: „скоро наперед!” бил кольбом от револьвера всіх, кого, лем допал. Вытворило ся положене таке, што били со всіх стран. Идучи в переді воякы били, штобы ся не пхати, тото само робили воякы по боках, но и таксамо робил пан лейтнант, поганяющий со заду.

На першом поверсі (штоку), где містила ся прокуратория Окр. Суда, сказано нам, што справа не належит до ней, лем до Староства и приказано отпровадити нас до арештов. На сходах повторила ся знова тота сама история битя и наконец, змучены, збити и скатованы достали мы ся до концелярии управителя арештов. Там строга ревизия, в часі котрой отобрано нам всі наши річи и дуган, а погодивше розміщене по келях.

Было уже совсем темно, коли, вартяр запровадил мене до келі, в котрой рушали ся якыси тіни. По том, што пережило ся в пару послідных годынах и чого дознало ся от людей, был я так знеохоченый до них, же с приятностью был бы я нашол ся в одиночці („ейнцлю”). Люде возбуждали во мні страх и отразу. Прото тыж, я не лем не обрадовал ся им в келі, а наооборт, засмутил ся их видом.

Але на світі уж так ест, же згрызота и радость міняють ся взаимно и же и в тяжкы минуты жизни заглядат часом луч радости. Так было и со мною в сос вечер. Ледво закрыли ся за мною двери, коли ктоси закликал на мене по имени. По голосі познал я своего дорогого друга, неотжалованого пок. Теодора Гнатышака, арештованого днем передом. Мы впали в собі в обьята и сразу всьо прожите представило ся

мені чимси веселым и комичным, а чорный „бартек” (так называли хліб, який доставали арештанты) смаковал мені не меньше от выставного обіда.

Слідуючого дня я увиділ в часі прохода д-ра Гассая, пок. инж. Джулинского, котрого приарештовано в Мушині, где он приїзжал все на літо, о. Романа Прислопского, пок. о. Гавриила Гнатышака, Александра Гнатышака, Климентия и Михаила Малиняков, пок. Михаила Дзюбинского, банкового урядника, родом с Верхомлі Великой и Дмитрия Вислоцкого, студента прав с Лабовы. По пополудни того дня припровадили жандармы о. Ивана Станчака, настоятеля прихода Высоцко, котрого арештовано в Тыличі, где гостил он у пок. о. Емилиана Венгрыновича и о. Ивана Хриз. Дуркота, настоятеля прихода Лабовы. Над вечером того дня вывезено, як мы позднійше узнали, до Кракова д-ра Гассая, о. Романа Прислопского и инж. Джулинского, а слідуючого дня рано о. Ивана Хр. Дуркота. Запановало меже нами пригноблене, выкликане непевностью, а также оповіданем ключников, што всіх вывезеных уже розстріляно. Пригноблене усилял также факт, же заострено в виду нас рыгор. Лем 15 минут денно можна было выходити нам на проход и в том часі позволено нам выкурити по 4 цыгаретки. В часі проходу не можна было с никым заговорити, ани ку никому наблизити ся, а по проході переводили у нас остру ревизию. Крім того переводили праві каждого дня ревизии по келях. Што пару дней выдавано приказ то гдеяким, то всім нам, паковати ся и быти готовыми до дороги по тото лем, штобы за годину, або 2, приказ тот откликати. Всьо тото мало на ціли грати на наших нервах и треба признати, же уж по пару днях осягнено свою ціль. Нервы у всіх были так напряжены, же само появлене ся жандарма, а навіт раптовне отккрые дверей вызывало у многих дрож в цілом тілі.

(Продолжене в слід. числі)

ШТО ЧУТИ В СВІТІ І В КРАЮ

Світова вистава в Нью-Йорку. В р. 1939 має бути уряджена світова вистава в Нью-Йорку. До прийняття участі в той виставі було запрошених 65 держав, з чого 56 держав виразило уже свою згоду. В виставі той виступить отже о 15 держав більше, як в минулорічній виставі в Парижі.

Загальний кошт урядження вистави, зв'язаний з будовою павільйонів поодиноких держав і фірм, обчислюють на суму 155 мільйонів доларів.

Цікавий процес. До Сан-Франциско приїхав комунікаційний парохід по своїй подорожі вокруг світа, котра тривала пару місяців.

В часі той подорожі уродилося на парохіді 8 дітей. Товариство, котре єст властителем корабля, зажадало от родичей тих дітей доплати за перевоз дітей. Родичи не згодилися на тото і справу отдано до суду. Цікаве єст, який засуд выдасть судня в той цікавій справі.

Годинник, зроблений с дерева. В місцевості Уппер-Дерби недалеко Філадельфії в Америк. Полн. єст годинник, якого другого нїт на цілому світі.

Годинник тот был зроблений перед перешло 300 роками через шведского годиняра, котрий виїхал до Америки на роботу. Всі колечка, шрубки і т. д. сут зроблені с твердого дерева і в цілому механізмі нїт ані одного кавальчика металевого.

Робота того годинника єст так прецизійна, же через 300 літ годинник ані раз не станує і тепер ходит также цілком добре.

Годинник тот належал до рижних людей. Тепер єго властителем єст богатий купец. Американські музеї предлагали за тот оригінальний годинник високу суму, але властитель не хоче єго продати.

Порозумлене меже Ватиканом і Злученима Державами Пн. Америки. Справа возновлення дипломатичних отношень меже Злученима Державами Пн. Америки і Ватиканом наближаєт ся ку концові. Отвітний проект закона має бути зголошений в коротком часі в американском парламєнті. Дипломатичні отношення были перервані перед перешло 70 роками. Послїднім послом американским при папском дворі был Руфус Кенг, именованный через президента Линкольна в р. 1863.

В Зальцбургу закрыто 3 монастири. В послїднем часі гитлеровські власти закрыли в Зальцбургу 3 монастири. Монахи достали приказ опустити безотложно монастири.

В Австрії знесено также обовязок учить религии в школах торговельных.

Збіжал знова с Совітов агент Г. П. У. Член Г. П. У. во Владивостоці, Лидке збіжал перед „чистком” до Шангхаю. Там зрадив он много тайн со способів вымушаня признаня ся до вини через оскаржених. Меже иншим, всаджат ся оскарженого до специальной келі, где єст незвычайно горячо і держит ся єго там так долго, покаль тот не тратит притомности. В том часі выдостає ся єго с келі і чутит. Таку практику повторят ся так долго, аж оскаржений подписує всьо, што лєм хотят.

Абисинский негус выиграл процес. Апеляційний суд в Лондоні выдал користный засуд для б. цисара Абисинии Гайле Селассіє, присуджаючи єму суму 10 тысяч фунтов штерлингов (близко 250.000 зл.) от англицкого

товариства, котре выарендовало в Абисинии концессию комуникации радио-телеграфичной.

Маршал Буденный спортивным судьей. Маршала Буденного усунено в послїдних часах цілковито от войсковых впливов і назначено председателем Верховной Рады спортивных судієв. Єст то доказ, же „перший советский кавалерист” стратил ласку Сталина.

Останки тіл царской родины находят ся во Франции. Б. начальник войсковой французской мисии на Сибіри, ген. Жанин подає сенсацийну вість о том, же останки тіл і одежи замордованой в Екатеринбургѣ царской родины отнайшли офицеры ген. Колчака, запаковали до металевых пак, опечатали і выслали до Франции, где они находят ся в скрытках одного банку.

Меже иншим має там находити ся спрячка от ремєня царевича.

Церкви замінено на магазини. Советські власти закрыли в Москві масу церковей і замінили их на магазини і шпихліри. И так: славный Преображенский Собор, где находит ся гроб легендарного князя Игоря, замінено на склад рыбной торговли („рыбторг”). Также знищено праві цілковито побудованный в X столітї собор в Борисоглебску. Крім того много церковей старинных с X і XI столітї замінено на склады і шпихліри.

Прикарпатська Русь жадає територіальній автономії. Председатель русского автономного і рольного Союза, посол Бродий, виїхал до Парижа, штобы там в политичных кругах звернути увагу на справу прикарпатско-руськ.

Ціль єго подорожі єст спричинити, штобы постановлення трактату в Ст. Жермен о територіальній автономії для Подкарпатской Руси были введены в жите перед полагожденіем конфликта чєско-німецкого.

По повороті с Парижа посол Бродий має перевести переговори с лордом Ренсименом. Переговори тоты однак має перепроводити по порозумленю ся с руском народом Радом і другима рускими організаціями.

Умер убийца послїдного цара Росии. По долгой хвороті помер Яков Юровский, убийца послїдного цара Николая II. Юровский, яко комисар чрезвычайки в Екатеринбургѣ в ночи с 16 на 17. липня 1918 р., в хаті купца Ипатієва, разом с 10-ома стражниками вымордовал цілу царську родину, стріляючи сам так до цара Николая II, як і до других членов родины, а также до лікара Боткина.

По убийстві приказал он вывезти тіла убитых за місто, где их поддано варварскому знищенію через спалєне по попередном обялтю бензином. Неспалєны останки шмарєно погодивше до старого шибу.

В пару днєй по той бєстияльської екекуции на мурах міста появили ся офіційальні обявлення о смерти царской родины. В обявлениях подано яко причину смерти факт, же царська родина наміряла утечи при помочи чужих держав.

Гром забил троє людєв. В Нью-Йорку, в місци рухливом ударил в дорогу гром, убиваючи на місци троє людєв і поражаючи 16. В часі повсталого переполоху 9 людєв было ранєных.

Встєклий пєс покусал 14 людєв. Перед пару тыжднями в селі Берєсть пов. грубєшовского встєклий пєс покусал 14 людєв. Никто с покусаных не звернул на тото увагы, не удал ся до лікара, ані не повідомил о том властей. Аж по якомси часі захворило двоє людєв на встєклизну і умерло в страшных болях.

Рєшту в числі 12-ох защеппєно, але лікары боят ся, же єст уж за поздно і же не даст ся их удержати при житію.

В Мадрыті бракує хлїба. В Мадрыті заряджено поменшанє порцій хлїба. Выдають там тепер 1 кг. хлїба на 10 людєв денно. Обявленє містовых властей подає до відомости, же припасы хлїба сут в місті малы і же може зайти потреба поменьшати знова порцію хлїба.

Ювильє Крєщєня Руси. Дня 1 серпня т. р. отпраздновано в Щавнику в пов. новосандецком 950-літний ювильє Крєщєня Руси. По отслужєню св. литургии і водосвятію высказал промову о значєнїю християнства на Руси д-р Александєр Хилєк, адвокат с Жолкви.

Таке саме свято отпраздновано в Жєгєстові пов. новосандецкого дня 7. серпня т. р. Проповідь выголосил там о. Фєнич.

Трагичный результат войсковых маневров. В часі тогорочных маневров англицких воздушных сил упало на землю 9 самолетов, і убило ся 9 летчиков.

Лєв вырвал ся с клітки і мало не росорвал сторожа. В Берлині в цирку в часі прятаня вырвал ся лєв с клітки. Сторож хотіл го загнати назад до клітки. Втотчас лєв шмарил ся на сторожа і поранил єго сильно. На помоч сторожови поспішил полиціант.

ДЕРЖАВНЕ ЗАВЕДЕНЄ КУРАЦІЙНЕ В БЕСКИДІ ЗАПАДНОМ

КРИНИЦА — ЗДРОЙ

Доїзд СКОРЫМА ПОїЗДАМИ через Тарнов—Новый Санч
ВАГОНЫ СЫПЯЛЬНЫ

15 жєрєл щав желізисто-земельных, богатых в безводник угля. — Здрой Зубєра, найсильнїйша щав алькалична Европы. (Польскє Виши), купєлі минєральны: квасоуглєвы і боровиновы. КУПЄЛІ СОНЄЧНЫ. — — Завєдєнє заосмотрєнє в найновїйши приряды лічничі. — — Купєль газовы сухы.

Пияльня і лазєнки, огріваны в зимі центрально. — Дом здроевый покои с теплом водом.

РЕСТАВРАЦІЯ — ДАНЦИНГ — ЧИТАЛЬНЯ — РАДИО

Театр в сезони головном, кино, спорты літны і зимушны.

Крыницькы воды лічат:

хвороты серця, жолудка, жолчи, печєнки, проводов мочовых, жєночи, малокровіє, нервы — дїєвуют добре на перемїну материи і т. д.